



CENTRALE BANK VAN ARUBA

## Caida den demanda pa credito na banconan comercial na maart 2021

Comunicado di prensa

Durante e reunion di 18 di mei 2021 y despues di a revisa dato economico y monetario mas recien, e Comite di Maneho Monetario (CMM)<sup>1</sup> di Banco Central di Aruba (BCA) a dicidi pa mantene e porcentahe actual di e tasa di e “reserve requirement” (reserva rekeri) na 7,0 por ciento. E tasa di e reserva rekeri ta e cantidad minimo di reserva cu banconan comercial mester mantene na BCA y ta igual na 7,0 por ciento di nan obligacionnan cu ta vence den menos di 2 aña. A considera e siguiente informacion y analisis pa yega na e decision aki.


### *Reservanan internacional*

E reservanan internacional (incluyendo e diferencia di revaluacion di oro y reserva di divisa) a aumenta cu Afl. 223,7 miyon te na un nivel di Afl. 2.580,3 miyon, te cu y incluyendo 30 di april 2021, compara cu fin di december 2020. E aumento aki ta debi principalmente na sosten di likides di gobierno Hulandes pa gobierno di Aruba y entradanan mas halto relata na turismo. Reservanan oficial di divisa a nota un subida di Afl. 109,8 miyon. Consecuentemente, e reservanan oficial y e reservanan internacional a yega te na, respectivamente, Afl. 2.317,7 miyon y Afl. 2.580,3 miyon riba 30 di april 2021. Di e manera aki e reservanan a keda na un nivel adecua ora di compara nan cu e nivel critico di 3 luna di pago registra ariba cuenta corriente y e metrico di ARA<sup>2</sup> di IMF (Grafico 1).

---

<sup>1</sup> E CMM a ser institui na mei 2010 pa periodicamente evalua y determina e maneho monetario di BCA. Adicionalmente, CMM ta aspira pa mehora e transparencia di maneho monetario.

<sup>2</sup> E metrico di IMF ARA ta referi na “Assessing Reserve Adequacy Metric” di Fondo Monetario Internacional cual ta midi con adecua e reservanan oficial ta door di compara esaki cu un averahe a base di peso di placa den circulacion, fianza entre companianan liga na otro, debe riba termino cortico y termino largo, y exportacion di bienes y servicio.



Graffico 1 – Desaroy den reservan oficial y internacional.

### Desaroyonan den credito

Den maart 2021, credito total a baha cu Afl. 28.5 miyon/0,7 porciento te na Afl. 3.935,6 miyon, compara cu fin di 2020. Esaki ta debi na e componentenan ‘fiansa na individuo’ (-Afl. 21,1 miyon/-1,1 porciento), ‘fiansa na empresa’ (-Afl. 3,9 miyon/-0,3 porciento), y ‘otro’ (-Afl. 3,6 miyon/-0,7 porciento). E categoria ‘fiansa na individuo’ a cay pa motibo di un demanda mas abou pa credito na consumidor. Mientrastanto, e componente ‘fiansa na empresa’ a mengua a causa di hipoteca comercial.

## Inflacion

E Indice di Prijs di Consumo (CPI), tabata 1,1 por ciento mas abou na maart 2021 compara cu e mesun luna di e aña anterior (Grafico 2). Esaki tabata primordialmente causa pa prijsnan mas abou den e categorianan 'recreacion y cultura' y 'pañã y sapato'. E promedio di inflacion di 12 luna a baha te na -2,3 por ciento na maart 2021. E promedio di inflacion di 12 luna, excluyendo e componentenan di energia y cuminda, tabata -0,9 por ciento na maart 2021 compara cu 0.1 por ciento na December 2020.




Grafico 2 - Inflacion

## Likides prudencial

E proporción di likides prudencial di e banconan comercial (34,8 por ciento), cual ta midi e cantidad di activo likido compara cu e activo total neto di e banconan comercial, a keda na un nivel comfortabel den maart 2021, compara cu e likides minimo rekeri di 15,0 por ciento.

Banco Central di Aruba

11 di juni 2021